



IZJAVA CENTRALNOG ODBORA SINDIKATA UNIVERZITETA U SARAJEVU

Predstavnici Sindikata Univerziteta u Sarajevu dana 7. 2. 2014. god. održali su sastanak s predstavnicima Vlade Kantona Sarajevo i premijerom gosp. Suadom Zeljkovićem, na kome je razmatrana situacija poslije odluke Centralni odbor Sindikata Univerziteta u Sarajevu da pokrene proceduru za otpočinjanje štrajka na dan 17. 2. 2014. god.

Poslije dužeg razgovora zaključeno je da će se odmah pristupiti izradi Kolektivnog ugovora između Vlade Kantona Sarajevo i Sindikata Univerziteta u Sarajevu o reguliranju osnovnih prava i obaveza zaposlenih na Univerzitetu u Sarajevu uz uvažavanje realnog ekonomskog i socijalnog stanja u našem društvu. Nekoliko sati kasnije nastupila je erupcija opravdanog nezadovoljstva građana Kantona Sarajevo zbog višegodišnjeg zanemarivanja njihovih egzistencijalnih pitanja i nerješavanja niza socijalnih pitanja svih kategorija građana, a posebno mladih koji tek stupaju u život.

Sindikata Univerziteta u Sarajevu u ovoj složenoj ekonomskoj i političkoj situaciji u Kantonu Sarajevu i našoj državi Bosni i Hercegovini smatra da treba sačekati formiranje nove stabilne Vlade Kantona Sarajevo i uspostaviti s njom dijalog u narednom periodu.

U skladu s tim Sindikata Univerziteta u Sarajevu privremeno prolongira početak sveobuhvatnog štrajka na Univerzitetu u Sarajevu i eventualne razgovore s Vladom Kantona Sarajevo za sredinu ljetnog semestra akademske 2013/2014. godine.

Svim srcem podržavamo iskazano nezadovoljstvo prosvjednika u gradovima Bosne i Hercegovine i želimo naglasiti da su nužni radikalni potezi u pokretanju privrede u svim područjima naše zemlje, pokretanje odgovornosti za zloupotrebe u upravljanju raspoloživim prirodnim i privrednim bogatstvima, te da je potrebno omogućiti podizanje stepena odgovornosti nosilaca vlasti na svim nivoima. Posebno se zalažemo za neprikosnovenu zaštitu objekata od rušilačkih aktivnosti, koji predstavljaju institucije zakonodavne i izvršne vlasti u državi Bosni i Hercegovini.

Smatramo da odgovornost za stanje nije samo u vladama Federacije Bosne i Hercegovine, kantona i općina, nego da ta odgovornost postoji u svim strukturama u kojima je dominantan utjecaj vladajućih političkih partija. Mišljenja smo da skupštine općina, kantona i skupštine Federacije BiH trebaju stalno zasjedati i po ubrzanom postupku pristupiti donošenju zakonskih propisa za razrješavanje nagomilanih problema zbog neodgovornosti užih interesnih grupa ili njihovih ličnih interesa.

Vlade izvršavaju samo stavove političkih partija preko zastupnika u skupštinama svih nivoa.

U skladu s tim, naša dužnost je da istaknemo kako demokratski procesi trebaju obuhvatiti i fakultete i akademije, samim tim i Univerzitet u cjelini. Profesori, asistenti, istraživači, kolegice i kolege u bazičnim službama za stabilno funkcionisanje Univerziteta imaju pravo da slobodu akademskog izražavanja mišljenja i stavova bez ikakvih posljedica po njihov status na Univerzitetu, a da se pri tome poštuju sve norme kulturnog dijaloga, isključujući vrijeđanje ličnosti pojedinaca.

Smatramo da je potreban veći utjecaj nastavno-naučnih vijeća u svakodnevnom radu fakulteta i akademija, aktivno učešće svih profesora Univerziteta u izboru rektora i dekana. Ne smijemo više dopustiti da politika ili interesne grupe utječu na donošenje suštinskih odluka na Univerzitetu. Zaposleni na Univerzitetu moraju biti informirani o svim odlukama koje se razmatraju na Senatu Univerziteta i o tome ko stoji iza pojedinih ključnih odluka i investicija. Dekani su naši predstavnici i trebaju se prije svega brinuti o dobrobiti zaposlenih na fakultetima i akademijama itd. Ukratko rečeno, potrebno je osigurati postojanje akademske slobode na Univerzitetu u najširem smislu riječi!

Sarajevo, 12. 2. 2014. god.

Predsjednik Sindikata Univerziteta u Sarajevu

Prof. Dr Berko Zečević